

Despues di 8 aña di ausencia

Festival

'VOZ I LANDIA ESCOLAR'

ta bek den nos comunidad

Un festival cu sigur tabatin gran acogida den nos comunidad den e añanan 90, tabata Voz i Landia, cu a inicia na 1981 en conexion cu aniversario di Fatima College na Dakota, unda cu varios di nos cantantenan local profesional a sali, manera; Ramphis Tromp, Cesar Olarte, Sylvienne Vrolijk, Joselito Geerman y Edjean Semeleer.

Awo despues di 8 aña di ausencia, un comision nobo, consistiendo di: Vicky Arends, Addonsito Croes, Franklin Richardson, Raquel Lampe, Rachel Kraaijvanger, George Winterdaal, Raymond Kamperveen y dos pilar y motor di e festival aki; Maybelline Arends-Croes y Gemmy de Freitas, ta cla pa rebiba e festival aki, cu tanto artista a uza como nan prome salida como cantante.

"For di tempo cu mi tabata na Hulanda, mi a priminti mi mes cu ora mi regresa Aruba, mi lo percura pa e festival di Voz i Landia escolar wordo rebiba. Pa mi Voz i Landia ta e motivacion musical mas grandi den historia di Aruba," ta loke Addonsito Croes a indica na Focus. Su funcion ta di colaborador activo cu varios tarea, entre otro di Maestro di Ceremonia, unda e lo comparti escenario cu 3 hoben ganador di Arte di Palabra 2013.

Na 1980 y 1981, e maestro, Gemmy de Freitas, a organisa un festival di voz y cancion entre e scolnan; Pius X y Fatima College y esaki a resulta den un exito grandi. Asina a dicidi di organisa e prome festival di Voz i Landia Nacional na 1982, entre e scolnan basico di Aruba. E prome ganadorman tabata: Ricky Figaroa di St. Anna School, "E Kabrito di Mo Tito", di Maybelline Arends-Croes y Ferdinand Carrion, "Cunucu di Seit", di Don Ramon Krozendijk.

Den historia di Voz i Landia, solamente 2 cantante a yega di obtene e titulo di Ganador di Voz i Landia 2 biaha y ta trata di Cesar Olarte y Sylvienne Vrolijk.

En total tin 24 scol di Aruba participando den grupo A y B, cu un orkestra bou di direccion di Amado Rossina. Tur cantica ta original na Papiamentu y ta expresa e mundo di mucha. Maybelline Arends-Croes ta e persona encarga pa aproba cada letra di e cantica y e famoso koor; Tuti Fruti, ta compaña nos muchanan.



Comision nobo:
Gemmy de Freitas, Raquel Lampe, Maybelline Arends-Croes,
Addonsito Croes, George Winterdaal, Vicky Arends

Grupo A a presenta dia 21 di april y Grupo B dia 4 di mei, ambos den Cas di Cultura. Dia 5 di mei, ta e semi final di Grupo B den Cas di Cultura y e gran final lo ta dia 9 di juni den Renaissance Convention Center.

E miembronan di comision mes lo ta encarga pa scoge e huradonan, cu ta saca e ganadorman di Voz i Landia Escolar 2013 y e comision ta gradici Gobierno di Aruba (FDEC),

UNOCA, Setar Aruba NV y Magic 96.5 FM pa duna nan sosten total na e bunita proyecto aki y tambe tur e sponsornan cu ta colaborando cu Voz i Landia.

Di parti di e team di revista FOCUS, nos ta desea tur e participantenan hopi exito y cu pueblo di Aruba duna apoyo total na tur nos participantenan.



Sinta patras robez – drechi: Gemmy de Freitas – Richard Holmond – Amado Rossina – Eddy Tromp
Sinta dilanti robez-drechi: Teofilo 'Vio' Wester – Reinaldo Suarez – Ivan Quandus – 'Chucho' Hoek